

13 JUN 2002

Najib-Pakistan

DR MAHATHIR MAMPU MENJADI PENAWAR KRISIS INDIA-PAKISTAN, KATA NAJIB

PEKAN, 13 Jun (Bernama) -- Perdana Menteri Datuk Seri Dr Mahathir Mohamad mampu memainkan peranan sebagai orang tengah untuk membantu meredakan ketegangan antara India dan Pakistan, kata Menteri Pertahanan Datuk Seri Najib Tun Razak.

Katanya, Dr Mahathir sebagai pemimpin berwibawa yang mendapat pengiktirafan tinggi seluruh dunia, mampu untuk menjadi "penawar" kepada krisis antara dua buah negara Asia Selatan itu.

"Saranan yang dibuat wakil Presiden Pakistan itu adalah sebagai menghormati Perdana Menteri sebagai pemimpin berwibawa, sama ada Perdana Menteri akan menerima, itu soal lain, tetapi hubungan beliau yang rapat dengan kedua-dua pemimpin ini - India dan Pakistan, saya kira dapat menjadi penawar kepada suasana di sana," katanya kepada pemberita selepas merasmikan bangunan tabika Kemas Peramu Jaya 1 di sini hari ini.

Najib berkata demikian ketika diminta mengulas mengenai permintaan Presiden Pervez Musharaff supaya Dr Mahathir menggunakan jasa baiknya untuk bercakap dengan kerajaan India bagi meredakan ketegangan dua buah negara itu.

Wakil khas Presiden Pakistan, Najmuddin A. Shaikh menyuarakan harapan itu dengan mengemukakan surat daripada Presiden Musharaff semasa berjumpa Timbalan Perdana Menteri Datuk Seri Abdullah Ahmad Badawi semalam.

"Ini satu pengiktirafan yang tinggi kepada Perdana Menteri kita kerana Dr Mahathir terkenal di seluruh dunia sebagai pemimpin berwibawa dan tegas serta adil dan sebab itulah beliau dan kepimpinan beliau itu dihargai bukan sahaja di Pakistan dan di India tetapi di merata tempat di dunia," kata Najib.

Pada perkembangan lain, Najib yang juga Naib Presiden Umno berkata pelbagai usaha dilakukan oleh kerajaan untuk menyelesaikan kes penyelewengan Perwaja.

Kerajaan tidak pernah berniat menutup kes itu sepertimana yang didakwa sesetengah pihak sebelum ini, katanya.

"Memang kerajaan tidak berniat tutup kes Perwaja, kalau ada pihak menuduh, itu salah sangka, sekarang telah terbukti tidak benar sama sekali...Dalam lawatan Perdana Menteri ke Switzerland, tiga pegawai Badan Pencegah Rasuah ikut sama," katanya.

Kerajaan Switzerland juga telah menyatakan kesediaan untuk membantu Malaysia dalam siasatan kes itu, tambah Najib.

-- BERNAMA

MS MS MOZ